

պանները եթե կամենային, կարող էին անել լոյս տալ իրանց կրպակներին: Բայց այդ շահաւետ չէր լինի նրանց համար, որովհետեւ խաւարի ու մթութեան մէջ անելի հեշտ էր խաբել, անելի հեշտ էր վատ ապրանքը լաւի տեղ վաճառել:

Իմ գլխում ծագեց մի համեմատութիւն: Միթէ՞ անետարանի լոյսն ու ճշմարտութիւնը քարոզող միսիոնարները նոյնպիսի վաճառականներ չէին: Միթէ՞ նրանք եւս իրանց դպրոցները խաւարի մէջ չէին պահում, ինչպէս բաղէջի վաճառականը՝ իր կրպակը: Միթէ՞ նրանք եւս իրանց առետուրը մթութեան մէջ չէին կատարում, որ անելի հեշտ լինի խաբել: Միթէ՞, եթե ցանկանային նրանք, չէին կարող անել լոյս տալ իրանց դպրոցներին, այն աստուծային կենսատու լոյսը, որի տարածման համար առաքուած էին:

Ամէն տեղ ես լսում էի նոյն վիճաբանութիւնները, կարծես, ամբողջ քաղաքը վարակուած լիներ այդ ախտով: Խարդախ վաճառականութեան հետ կատարւում էր եւ կրօնական խարդախ պրոպագանդա: Իսկ հայ քահանան վերելում, կտուրների վրայ, զանազան ուտեստների «նմուշներ» էր հաւաքում իր թաշկինակի մէջ...

Ես զգոնաբով դուրս եկայ չարշիներից:

Բաղէջը գտնւում է չորս վանքերի հոգեւոր պաշտպանութեան ներքո: Նրանցից մէկը քաղաքի միջումն է, իսկ երեքը՝ նրա շրջակայքում: Ամլորդու վանքը գտնւում է նոյնանուն թաղի մէջ: Նրանից կէս ժամ հեռաւորութեան վրայ կանգնած է Գոմաց ս. Աստուածածնի վանքը, յետոյ Աւետիս ս. Աստուածածնի վանքը եւ Խնդրակատար ս. Աստուածածնի վանքը: Թաղէոս առաքելը ուխտել էր Հայաստանում հազար վանքեր հիմնել ս. Աստուածածնի անունով. յիշեալ երեքը միայն Բաղէջի մօտակայքում հիմնեց:

Բացի չորս վանքերից, չորս հոյակապ եկեղեցիներ քաղաքի մէջ հոգեւոր սնունդ են մատակարարում բնակիչներին: Կարմրակ կոչուած եկեղեցին պահում է իր մէջ Յիսուս Քրիստոսի արեան շիթը. նա այն աստիճան պաշտելի է, որ նրա անունով երդւում են մինչեւ անգամ մահմեդականները: Այդքան հոգեւոր հիմնարկութիւններից յետոյ հաջի Իսաղը դարձեալ փողոցներում կրօնափոխութիւն է քարոզում: Ի՞նչ է դրա պատճառը...

Փողոցներում շրջում էին հայ կանայք: Ամէնքը, թէ պառաւ եւ թէ մականահասակ, իրանց գեղեցիկ եւ նուրբ կերպասներից կարոած զգեստների վրայ հագած ունէին մի տգեղ, մինչեւ ոտները իջած շիւայ շապիկ: Այդ արտաքին ծածկոցը նրա համար էր, որ նրանց նազելիութիւնը չգրաւ մուսուլմանի վաւաշոտ հայեացքը: Տղամարդիկ նոյնպէս վատ էին հագնուած: Այս-